

Կ. Մ. ՄՈՒՐԱԴՅԱՆ

ԲԱՐՍԵՂ ԿԵՍԱՐԱՅԻՆ ԵՎ ՀԱՅԵՐԸ

(Կապաղովկյան գործունեության շրջան)

Հնագույն ժամանակներից ի վեր Կապաղովկյան Կեսարիայի եկեղեցին վճռական նշանակություն է ունեցել հայոց եկեղեցու և վանականության սկզբնավորման հարցում¹։ Հայոց հայրապետը՝ Գրիգոր Լուսավորիչը, ուսանել է Կեսարիայում, այնտեղ էլ ստացել իր ձեռնադրությունը։ «Եւ եղեալ ժողով բազմութեան եպիսկոպոսաց ի քաղաքն Կեսարացոց, զի ձեռնադրեսցեն զսուրբն Գրիգորիոս և աւանդեալ ի նա զպատիւ խոնարհութեան քահանայութեանն Քրիստոսի, և զբարձրութիւն եպիսկոպոսութեան փառաւորութեանն Աստուծոյ, զպատիւն և զփառսն մեծ»²։

Գրիգոր Լուսավորիչից սկսած՝ նրա կաթողիկոսության տան բոլոր անդամները ուսանել են Կեսարիայի դպրոցներում և առաջին անգամ այնտեղ մոտիկից հաղորդակից դարձել վանական կյանքի կառուցվածքին ու եկեղեցու հաստատությունը։ Կապաղովկյան Կեսարիայի եկեղեցին նախատիպ ընդունելով՝ հետագայում նրանք ձեռնարկեցին հայոց եկեղեցու ու վանականության հիմնադրման գործը։ Շօգուտ ասվածի է խոսում նաև Բարսեղ Կեսարացու ժամանակաշրջանի հայ-հունական եկեղեցական փոխառնչությունների պատմությունը։

Գրիգոր Լուսավորիչից հետո հայոց եկեղեցուն մեծ երախտիք մատուցեց ներսես Մեծը։ Նա Բարսեղ Կեսարացու ժամանակակիցն էր՝ ծնված մոտավորապես 334 թվականին։ Ներսեսը «սնաւ և ուսաւ ի Կեսարիացոց զաւառին...»³, որտեղ և առաջին անգամ մոտիկից հաղորդակից դարձավ քրիստոնեացման շրջանի եկեղեցու բնույթին ու վանական դասի կենցաղին։ Հայաստան վերադառնալուց հետո, հակառակ իր իսկ համառ ընդդիմացումներին, ներսեսին և նրան ուղեկցող շքախմբին ժողովրդի ցանկությամբ ու Արշակ թագավորի հրամանով, ինչպես գրում է Բուզանդ պատմագիրը, «...արձակեցին բազում ընծայիւք և մեծամեծ պատարագօք և հաւատարիմ հրովարտակօք առ կաթողիկոսաց կաթողիկոսն Նսերիոս յերկիրն Գամրաց, և ի մայր քաղաքացն նոցա ի Կեսարիա, զի ձեռնադրեսցեն անդ զսուրբն Ներսէս ի կաթողիկոսութիւն Հայոց մեծաց»⁴։ Այնուհետև պատմագիրը ավելացնում է. «Իսկ իբրեւ եհաս ժամ՝ յորժամ կամեցան զներսէս ձեռնադրել, վերացաւ աղաւնին ի սրբոյն Բարսեղէ, և

1 Տե՛ս Յ. Թ. օփճեան, Ծագումն հայ վանականութեան (սէոյս», 1905, N 15, էջ 360—361)։

2 Ազաթանգեղայ Պատմութիւն հայոց, Թիֆլիս, 1914, էջ 408—409։

3 Պատմութիւն սրբոյն ներսիսի Պարթեւի հայոց հայրապետի (տե՛ս Սոփերք Հայկականք, 2, ի վենետիկ, 1853, էջ 14)։

4 Փաւստոսի Բուզանդացոյ Պատմութիւն հայոց, Վենետիկ, 1933, էջ 81 (այսուհետև՝ Փ. Բուզանդ)։

նստաւ ի վերայ գլխոյն ներսէսի»⁵։ Այն ժամանակ Բարսեղ Կեսարացին Եվսեբիոս եպիսկոպոսի տեղապահն էր և իր հիմնած վանքերի ու բաղամաթիւ բարեգործական հաստատութիւններին շնորհիւ ունէր մեծ ժողովրդականութիւն։ Բուղանդի գրառած աղավնու միջադեպը, անտարակույս, զերծ չէ առասպելախառն տարրերից, դա միաժամանակ երևում է պատմագրի արած «սքանչելիք և նշանք յԱստուծոյ...» բնորոշումից, որը հատուկ է առասպելների վիպական վերապատմանը։ Նման պարագայում այն ունի հայ-հունական եկեղեցական խաղաղ հարաբերութիւնն ակնարկող հիմք և հեռու է հավուր պատշաճի հորինվածք լինելուց։ Բացի այդ, աղավնու միջադեպը մասնավորապես ուղղակի ակնարկ պետք է ընդունել Բարսեղ Կեսարացու և ներսեսի հոգևոր գործունեութեան ընդհանրութեան ու ժողովրդայնութեան։ Դա առավել որոշակի է դառնում, երբ քննում ենք ներսես Մեծի հայոց մեջ ծավալած հոգևոր գործունեութիւնը։

Ներսեսը սկզբնական շրջանում հանդես է գալիս Բարսեղի հոգևոր ձեռնարկումների բացահայտ ընդօրինակմամբ. ստեղծում է բաղամաթիւ վանական-բարեգործական հաստատութիւններ (ծերանոցներ, կուսանոցներ, աղքատանոցներ, հյուրանոցներ, հիվանդանոցներ, որբանոցներ, այրիանոցներ և այլն), որոնց էութեանը մոտիկից հաղորդակից էր եղել Կեսարիայում։ Այս առումով կարևոր է Մ. Խորենացու մի հաղորդումը. «Եւ ի Բիւզանդիոյ դարձեալ ի Կեսարիայ, և եկեալ ի լայս՝ զամենայն կարգս ուղղութեան հարցն իւրոց նորոգեալց, այլ և առավել ևս, քանզի զբարեկարգութիւնն զոր ետես ի Յունաց աշխարհին, մանաւանդ ի թագաւորեալ քաղաքին, ի սմա նկարագրէ»⁶։ Խորենացին «թագաւորեալ քաղաք» արտահայտութեան տակ ի նկատի ունի Կապադովկյան Կեսարիան։

Ներսեսը, պետք է ենթադրել, հենց քրիստոնեութեան վերջնական տարածման ու Հայաստանում հաստատման ճանապարհին ծառացած դժվարութիւնների դեմ պայքարի միջոցների քննութեան առիթով գումարեց առաջին եկեղեցական ժողովը։ Փափստոս Բուզանդը գրում է. «Ժողովեցան ի գեւդն Աշտիշատ, ուր զառաջինն զեկեղեցին էր շինեալ. զի նա էր մայր եկեղեցեացն, և տեղի լեալ նախնեացն ժողովոց սինհոդոսին։ Ի ժողով հաւանութիւնս եկեալ ամենեցուն, և խորհուրդ բարեաց ի մէջ արկանէին, կատարել անդ զաշխարհական կարգս եկեղեցւոյն և ժողովն հաւատոցն հաւասարութեան։ Յայնմ ժամանակի կարգեցին կազմեցին կանոնեցին յօրինեցին, և արարին զամենայն ժողովուրդս երկրին Հայոց իբրեւ կարգ միաբանութեան վանականաց համաշխարհի, բայց միայն՝ յամուսնութեան օրինացն։ Բայց միայն զառաքելական կարգ կանոնսն ի վերայ ամենեցուն կացուցանէր սուրբ եպիսկոպոսապետն ներսէս...»⁷։

Պատմագիրը, ինչպես տեսնում ենք, Բարսեղ Կեսարացու անունը չի տալիս, սակայն պետք է ենթադրել, որ այդ ժողովում ներսեսի նախաձեռնութեամբ քննվել, վերանայվել է Բարսեղ Կեսարացու՝ եկեղեցական բաղամաթիւ միջոցառումներն ու կանոնները հայոց եկեղեցու վրա տարածելու հարցը։

5 Փ. Բ ու գ ա ն դ, էջ 82։ Սոփերք Հայկականք, 2, Վենետիկ, 1853, էջ 28։

6 Մովսիսի Խորենացու Պատմութիւն հայոց, աշխատ. Մ. Արեղեան և Ս. Յարութիւնեան, Տփղիս, 1913, էջ 279։ (Այսուհետև՝ Մ. Խորենացի)։

7 Փ. Բ ու գ ա ն դ, էջ 84։

Փաւստոս Բուղանդը, որ վիպական պատկերներով է ներկայացնում ներսեսի վարքը, հայոց նորաստեղծ եկեղեցու ու նրա առաջնորդի, այսպես կոչված, շահերից ելնելով՝ հիշյալ կանոնների հեղինակի անունը չի տալիս: Բայց նրա՝ «ղառաքելակարգ կանոնան» արտահայտությունը, անկասկած, առաջին հերթին Բարսեղի կանոններին է վերաբերում:

Եկեղեցական կանոնների խստադույն անհրաժեշտությունը IV դարում պայմանավորված էր վանական կյանքի աննախադեպ ծաղկմամբ:

Վանական կյանքի հիմնադիրն ու զարգացնողը մեղանում ներսես Մեծը եղավ: Նա Մեծ Հայքում բազմաթիվ վանքեր հիմնեց՝ դրանք բնակեցնելով վանականների ստվար բազմությամբ: Սակայն հետաքրքրականն այն է, որ ինչպես Բարսեղ Կեսարացին Կապադովկյան Կեսարիայում, այնպես էլ ներսես Մեծը Հայքում նախապես երկյուղ էր կրում վանական պորտաբույծ, անաշխատ կյանքի տարածման նկատմամբ, որի համար էլ բազմաթիվ պատժամիջոցներ սահմանեց: Ի վերջո՝ նա կարողացավ հասնել այն բանին, որ «...եղեւ խաղաղութիւն և նորոգութիւն յաւուրս նորա. ամենայն եկեղեցեաց, և յաճախէր շուք պատուի ամենայն եպիսկոպոսացն ընդ ամենայն տեղիս Հայոց մեծաց: Եւ լուսաւորութիւն կարգի եկեղեցւոյ ամենապայծառ ծաղկեաց ամենամեծ լիութեամբ. կարգեցան կարգք կաթողիկէ եկեղեցեաց ամենայն վայելչութեամբ, և բազմացան կարգք սրբութեան պաշտամանցն, և պաշտօնէիցն յաճախութիւն: Եւ բազմացոյց զկարգս եկեղեցեաց ի շէնս և յանշէնս, սոյն օրինակ բազմութիւնք կրօնաւորաց»⁸: Բարսեղ Կեսարացու վանական գործունեությունը հիշեցնող այս հատվածը խոսում է հօգուտ Կեսարիայի թեմի առաջնորդի և ներսեսի հոգևոր ձեռնարկումների ընդհանրության, որոնք մեծ դեր խաղացին քրիստոնեությունը Հայաստանում հաստատելու դժվարին գործում:

Հայոց ներսես կաթողիկոսի և Բարսեղ Կեսարացու հայացքների ընդհանրության լավագույն գրավականն է արիոսականության դեմ մղած նրանց համատեղ պայքարը: Հայտնի է, որ 325 թ. գումարված Նիկիայի առաջին տիեզերական ժողովի դատապարտումից հետո էլ արիոսականությունը շարունակեց տարածվել Արևելքում: Հունաց Վաղես կայսրը այդ աղանդի երկրպագուներից էր: Արդ՝ Բարսեղ Կեսարացու թղթերից մեկը՝ գրված 372 թվականին իտալացի և գաղղիացի եպիսկոպոսներին, կարևոր է երկու նկատառումով: Նախ՝ նրանում հստակ շարադրված են հեղինակի մտքերը եկեղեցու դերի ու նշանակության, դրան զուգահեռ՝ արիոսականության սպառնացող վտանգների մասին: Ապա, որ ամենակարևորն է՝ հեղինակին համակարծիք 31 եպիսկոպոսներից երեքը, ինչպես պետք է ենթադրել անուններից, հայեր են: Այսպես՝ Եվսեբիոս, Վարսումա, Հովան անունների կողքին կարդում ենք՝ Խոսրով, Հուսիկ, Ներսես...:

Ուսումնասիրողներից Վ. Հացունին գտնում է, որ «Յիշեալ ներսէսդ անկասկած մեր ծանօթ կաթողիկոսն է, և ինք միայն կրնայ լինել, որովհետև այդ անունը մեր քով 'ի գարու մէջ միակն է, և չենք տեսներ ուրիշ ոչ մէկ աշխարհականի կամ եկեղեցականի վրայ»¹⁰:

⁸ Փ. Բուղանդ, էջ 86:

⁹ *Св'я Творения иже по святым отца нашего Василия Великого, архиепископа Кесарии Каппадокийская, часть VI*, Москва, 1892, стр. 197. (Այսուհետև՝ В. Великий).

¹⁰ Վ. Հացունի, *Արքեպիսկոպոսութիւն եւ մետրապոլիտութիւն հայոց մէջ* (տե՛ս «Բազմազգէպ», 1926, № 5, էջ 154):

Եթե անգամ մեր պատմագիրները հիշատակած լինեին Ներսես անունով վաղ շրջանի այլ հոգևոր գործիչների ևս, միևնույն է՝ Բարսեղ Կեսարացու վերոնշյալ թղթում հիշված ներսեսը պետք էր նույնացնել հայոց կաթողիկոս Ներսես Մեծի հետ, քանի որ ա) IV դարի հայոց եկեղեցու ամենանշանավոր դեմքը Ներսես Մեծն է, որի կաթողիկոսության տարիներին անհամեմատ բարձրացավ հայոց եկեղեցու հեղինակությունը նույնազավան ժողովուրդների շրջանում. բ) Բարսեղ Կեսարացու Փոքր Հայքի եպիսկոպոսների հետ ունեցած բազմաթիվ թղթակցությունները, Ներսես Մեծի՝ Բարսեղ Կեսարացու նորամուծությունների ընդօրինակումը Հայաստանում ինքնին վկայում են հայհունական եկեղեցական խաղաղ հարաբերությունների մասին, որի ժամանակ Բարսեղը միշտ էլ կարևորություն է տվել հատկապես դավանանքի հարցերում հայոց եկեղեցու հետ համակարծիք լինելուն: Նման պարագայում ինքնին հասկանալի է դավանանքի խնդրին վերաբերող թղթի տակ հայոց կաթողիկոսի, ինչպես նաև հայազգի եպիսկոպոսների անունների առկայությունը:

Մ. Խորենացին չի նշում Ներսեսի կաթողիկոսության սահմանները, Փ. Բուզանդը հակառակը՝ հաճախ է կրկնում «Մեծ Հայք» պատմական անվանումը¹¹: Բայց պատմական Հայաստանի մասն էր կազմում նաև Փոքր Հայքը:

Պրոկոպիոս Կեսարացու վկայությամբ Փոքր Հայքի մայրաքաղաք Մելիտինեն այնպես մեծացավ և բազմամարդ եղավ, որ քաղաքի ներսում այլևս կառուցելն անհնարին դարձավ¹²:

Արդ՝ նման պայմաններում ի՞նչ էր կատարվում հոգևոր կյանքի՝ դավանանքի նախընտրության բնագավառում, այլ կերպ ասած. ո՞վ էր տնօրինում քրիստոնեա-եկեղեցական հարաբերությունների վերջնական ձևավորումն ու ընթացքը Փոքր Հայքում:

Բանասեր Ա. Սուբրյանը գրում է. «Հօն (իմա՝ Փոքր Հայքում) Սուրբ Ներսիսի իշխանութիւնն շէր հասներ, այլ հպատակեալ էին սրբոյն Բարսղի, ինչպէս Սատաղ, Սերաստիա և Գաղթականութիւն Հայոց (Κοινωνία Ἀρμενίας)...»¹³: Եվ իրոք, Բարսեղ Կեսարացու Կապադովկյան շրջանի եկեղեցական գործունեության բնությունը ցույց է տալիս, որ Փոքր Հայքը հոգևոր ամենասերտ կապի մեջ է եղել Կեսարիայի եկեղեցու հետ: Սերաստիան, Սատաղիան, Նիկոպոլիսը և գաղթականություն կամ Գաղութը Հայոցը հնում հայտնի էին՝ «Չորեքքաղաքեան Հայք» (Τετραπολις Ἀρμενίας) անվանմամբ: Այս քաղաքների եպիսկոպոսները հունական դպրոցներում կրթված հայեր էին, բայց կրում էին զանազան հունական անուններ¹⁴:

Փոքր Հայքի եկեղեցա-դավանաբանական որևէ հարց չի լուծվել առանց Բարսեղ Կեսարացու անմիջական միջամտության: Նա առանձնապես խստապահանջ է եղել հայ նորընտիր եպիսկոպոսների լեզվական կուլտուրայի, ընդհանուր պատրաստվածության և իր ժողովրդի մշակույթի իմացության խնդրում:

¹¹ Փ. Բուզանդ, էջ 81, 86 ևն:

¹² Прокопий, О постройках, перевод С. П. Кондратьева. (Տե՛ս ВДИ, Москва, 1939, № 4 (9), стр. 246):

¹³ Ա. Սուբրիան, Մեծն Ներսէս Պարթև (տե՛ս «Բազմավէպ», հատոր I, Ե, Վենետիկ, 1877, էջ 326):

¹⁴ Տե՛ս Յ. Թորոսեան, Հ. Արսեն Սուբրի («Բազմավէպ», 1932, № 8—9, էջ 352):

Պատմական Հայաստանի վերոնշյալ գավառները՝ կտրված լինելով Մեծ Հայքի մշակութային-կրթական կենտրոններից, ուր եկեղեցական արարողությունը, անտարակույս, կատարվում էր հայոց լեզվով, հեշտությամբ կարող էին զրկվել մայրենի լեզվով հաղորդակցելու հնարավորությունից։ Նման պարագայում դրան ինչ-որ չափով կարող էր նպաստել նաև Կեսարիայի հոգևոր թեմը, որի ենթակայության տակ էին նրանք։ Սակայն Բարսեղ Կեսարացին ոչ միայն չի ընդդիմացել մայրենի լեզվով հաղորդակցվելու մտքին, այլև, ինչպես երևում է 372 թվականին գրած մի թղթից, ջանացել է, որ այս կամ այն հայկական գավառի եպիսկոպոս ընտրվի հայերենին քաջահմուտ անձ¹⁵։ Զ. Մարկվարտը այս առթիվ նկատում է. «Բոլոր մետրոպոլիտները չէ՛, որ կարող էին նույնքան խելացի գտնվել, որքան որ էր մեծն Բարսեղը, որն ուշադրություն դարձրեց, որպեսզի Փոքր Հայքի եպիսկոպոսական աթոռների համար ընտրվեին հայերենին քաջահմուտ մարդիկ»¹⁶։

Եվ իրոք, նա, դատափետելով հայազգի եպիսկոպոսի ուղիղ հավատից շեղվելու պարագան, ավելացնում է. «...նրա եպիսկոպոսական տնօրինության տակ կան՝ ինձ անուններով հայտնի, բանիմաց, լեզուների գիտակ և իր ժողովրդի մյուս արժանիքներին ծանոթ պատկառելի այրեր»¹⁷։ Ինչպես երևում է առկոչված հատվածից, Բարսեղ Կեսարացին հայ եպիսկոպոսների ընտրության յուրահատուկ սկզբունք է ունեցել։ Լեզվական ունակություններից բացի կարևոր է համարել նաև իր ժողովրդի արժանիքներին ծանոթ լինելը։

IV դարում, եկեղեցա-դավանաբանական վեճերի առկայության պայմաններում, Բարսեղ Կեսարացու տվյալ մոտեցումը բացառիկ կարևորություն ունեցավ եկապետ Փոքր Հայքի համար, որը, Մեծ Հայքից կտրված լինելու պատճառով, հոգևոր կյանքին ու քաղաքական անցուղարձին հաղորդակից էր դառնում միայն եպիսկոպոսների միջոցով։

Չնայած Բարսեղ Կեսարացու խստապահանջությանը՝ Փոքր Հայքի եպիսկոպոսների մեջ գտնվեցին արիստականության կողմնակիցներ, որոնցից մեկի բնութագիրը առկա է 377 թվականին Արևմուտքի եպիսկոպոսներին ուղղված Բարսեղ Կեսարացու թղթում¹⁸։ Դա Սերաստիայի հայազգի Եվստաթիոս եպիսկոպոսն էր։

Բարսեղը գրում է. «Խնդրում ենք ձեզ հոգ տանել այդ առթիվ և, եթե հաճո է, գրեք Արևելքի բոլոր եկեղեցիներին, որ խեղաթյուրված ուսմունքը եթե ուղղվի հաղորդակցման կրնդունվի, իսկ եթե ուզում են համառությամբ մնալ իրենց նորամուծությունների մեջ, ապա կառանձնացվեն եկեղեցուց»¹⁹։

Ինչպես երևում է նրա 372 թվականին բյուզանդական նշանավոր կառավարիչ (կոմս) Տերենտիոսին գրած մի թղթից՝ երկար ժամանակ թղթակցական կապ է պահպանել վերոնշյալ Եվստաթիոս եպիսկոպոսի հետ, ջանալով

15 S6՝ս В. Великий, հատ. 6-րդ, էջ 216։

16 Զ. Մարկվարտ, Հայոց այրերի ծագումը և Ս. Մաշտոցի կենսագրությունը (տե՛ս Մեսրոպ Մաշտոց, հոգվածների ժողովածու, Երևան, 1962, էջ 125)։

17 В. Великий, հատ. 6, էջ 216։

18 Творения иже во снятых отца нашего Василия Великого, архиепископа Кесарии Каппадокийския, часть VII. Москва, 1892, стр. 232. (Այսուհետև՝ В. Великий, հատ. VII և համապատ. էջը)։

19 В. Великий, հատ. 7, էջ 234։

ներան ուղիղ հավատի բերել: Հայոց շրջանում եղել են այդ կայրը քննադատող եպիսկոպոսներ, ուստի Բարսեղ Կեսարացին եկել է Հայաստան, ռիտախի գյուղում հանդիպել իրեն հիշյալ կայրի համար քննադատող անձանց հետ, հավատի հարցերի շուրջ մտքեր փոխանակել և շատ խնդիրներում հստակություն մտցրել²⁰:

Այնուամենայնիվ, Բարսեղ Կեսարացու թղթերից պարզվում է, որ Սերաստիայի եվստաթիոս եպիսկոպոսի Կեսարիայի թեմի նկատմամբ բռնած դիրքն ու հետագա գործունեությունը, ըստ էության, անհանգստացրել են Բ. Կեսարացուն, որի համար, իրավամբ, կային լուրջ պատճառներ:

Ինչպես երևում է Բ. Կեսարացու մի թղթից, IV դարի 70-ական թվականներին Փոքր Հայքում, մասնավորապես Սեբաստիայում, ընդդեմ պաշտոնական եկեղեցու, որոշակի տրամադրություն է խմորվել: Դա անհանգստացրել է մյուս գավառների թեմերին, որոնք և անհրաժեշտ են համարել հավաքվել նիկոյուսում՝ խորհրդակցելու:

Բարսեղ Կեսարացին նպատակահամար է գտնում մինչև ժողովի սկսվելը հանդիպել, իր իսկ արտահայտություններով՝ հարգարժան եվստաթիոս եպիսկոպոսի հետ²¹: «Եվ ասածո բարեպաշտությամբ, գրում է նա, պարզվեց, որ մենք (իմա՝ Բ. Կեսարացին և եվստաթիոսը) միմյանց հետ տարակարծիք չենք նույնիսկ աննշան խնդիրների մեջ»²²: Բայց պարզվում է, որ զրույցին ներկա է եղել նաև Սերաստիայի երեց Պիմենը, որը և խստագույնս քննադատել, հակաճառել է Բ. Կեսարացուն²³:

Բարսեղը ջանացել է եվստաթիոսի և իր մեջ տարակարծությունների շփոթությունը հասու դարձնել նաև Սեբաստիայի եպիսկոպոսի հակառակորդներին, զրա համար կարևոր է համարել ունենալ գրավոր հավաստիք: Եվ նա Բարսեղ Կեսարացու 373 թ. կազմած «Հավատո հանգանակի»²⁴ տակ ստորագրում է. «Ես՝ եվստաթիոս եպիսկոպոս, կարդալով (սույնը), քեզ՝ Բարսեղիդ, ասացի իմ կարծիքը և համաձայնեցի վերոգրյալին...»²⁵: Սակայն, Թեոդոտ հայ եպիսկոպոսի հավաստմամբ՝ եվստաթիոսը, Բարսեղ Կեսարացու մոտից հեռանալուց հետո, «... իր աշակերտներին հավատացնում էր, որ ինչ վերաբերում է հավատին՝ ոչ մի կետում համակարծիք չէ Բ. Կեսարացու հետ»²⁶:

Եվ իրոք, Սերաստիայի եվստաթիոս եպիսկոպոսը իրականում սկզբունքորեն դեմ էր ուղղափառ եկեղեցու օրինենտացիային և պայքարում էր նրա դեմ: Այդ է վկայում նրա համախոհներից վերոհիշյալ Պիմենի և Սեբաստիայի այլ երեցների բացահայտ պայքարի ելնելու նկրտումները ընդդեմ Բարսեղ Կեսարացու և նրա հովանավորած ուղղափառ եկեղեցու²⁷: Սակայն եվստաթիոսի համար հեշտ չէր Բարսեղի դեմ պայքարելու ամբողջ ծանրությունը իր վրա վերցնել և բացահայտ դուրս գալ նրա դեմ:

20 Տե՛ս В. В е л и к к и й, հատ. 6, էջ 213—214.

21 Տե՛ս անդ, էջ 213.

22 Տե՛ս անդ.

23 Տե՛ս անդ.

24 Տե՛ս անդ, էջ 248—253.

25 Անդ, էջ 252—253.

26 Անդ, էջ 214—215.

27 Անդ, էջ 242.

Հակառակ Եվստաթիոսի նենգամիտ մտադրություններին՝ Բ. Կեսարացին, ինչպես այդ ցույց է տալիս նրա մի թուղթը, մինչև 373 թվականը, թվում է, ընավ չի կասկածել Սեբաստիայի եպիսկոպոսի ուղղափառ եկեղեցու նկատմամբ ունեցած նվիրվածությանը։ Ավելին՝ նա ջանացել է Եվստաթիոսի միջոցով խաղաղեցնել Սոֆրոնիոսի գլխավորությամբ Սեբաստիայում խմորվող իրարանցումները, ուստի և վերջինիս գրում է. «Աղաչում եմ ձերդ ղթասրտությանը ետ պահել նրան (իմա՝ Սոֆրոնիոսին) այդ արատավոր ճանապարհից, և ավելի լավ է սեփական նվիրվածությամբ միասնության ձգտել, քան թե փոխանջատվածությամբ համադորժակցել նրանց հետ, ովքեր բաժանման են ձգտում»²⁸։

Սակայն նույն 373 թվականին Նիկոպոլսի Թեոդոտ եպիսկոպոսին գրած մի թղթից պարզվում է բոլորովին այլ բան. Բարսեղ Կեսարացին իրականում որոշակի պատկերացում է ունեցել Եվստաթիոսի պաշտոնական եկեղեցու և իր նկատմամբ բռնած դիրքի մասին և միտումնավոր լուել է՝ Դա ինքը՝ Բ. Կեսարացին, այսպես է պատճառաբանում. «Իսկ ես նրա (իմա՝ Եվստաթիոսի) իմ նկատմամբ ունեցած վերաբերմունքի մասին լուեցի ոչ թե այն բանի համար, որ նա արժանի չէր ուշադրության, այլ նրա համար, որ արդեն լուրը տարածվել էր ամենուր, ուստի և ոչ ոք իմ հաղորդման կարիքը չունենր, որպեսզի գիտենար այդ մարդու մտադրությունը»²⁹։

Բարսեղ Կեսարացու վերոբերյալ թուղթը, ուր խնդրում է Սեբաստիայի եպիսկոպոսին վերջ տալ ընդհանուր միասնությանը խանգարող երեցների ներքին անհամաձայնություններին, գրված է 372 թվականի վերջերին կամ, ամենաուշը՝ 373 թ. սկզբներին. համենայն դեպս ավելի վաղ, քան այն թուղթը, որտեղ Կեսարացին այլևս չի թաքցնում իր և Եվստաթիոս եպիսկոպոսի թշնամական փոխհարաբերությունը։ Ավելին, նա նույն թղթում արդեն խոսում է հայազգի եպիսկոպոսի իր դեմ ունեցած հակաճառությունների, շարախոսությունների ու զրպարտությունների մասին³⁰։

Արդ ո՞րն է Բարսեղ Կեսարացու նման մոտեցման պատճառը։ Բ. Կեսարացին տարիներ շարունակ աշխատել է զաղտնի պահել իր և Եվստաթիոսի անհամաձայնությունը եկեղեցու հետ կապված սկզբունքային շատ հարցերում, այնպես որ այն երբեք հասարակական քննության առարկա չդառնա։

Սեբաստիան Փոքր Հայքի ամենամեծ ու հայաշատ գավառն էր. նրա ինչ-որ խնդրի շուրջ ունեցած դիրքորոշումը վճռական կարող էր հանդիսանալ Փոքր Հայքի բոլոր գավառների համար։ Դա առավելապես որոշակի դարձավ IV դարի 60—70-ական թվականներին, երբ առաջինը Սեբաստիայում սոցիալ-տնտեսական բազայի վրա սկզբնավորվեցին բազմաթիվ աշխատավորական հուզումները։

Եվստաթիոսը և նրա կողմնակիցները ըստ էության արիստականներ էին, որը և տանում էր դեպի պաշտոնական եկեղեցու ժխտում։ Աշխատավորական շարժումները սկզբնապես սոսկ սոցիալական հողի վրա էին և դարձյալ առաջին հերթին պաշտոնական եկեղեցու դեմ էին ուղղված։ Այս հարցում, թվում է, եկեղեցին որոշ հանցանք ուներ։ Այն բավական շուտ ընդօրինակեց ավատա-

28 Անդ, էջ 242.

29 Անդ, էջ 261.

30 Տե՛ս անդ, էջ 262.

տիրական կարգերին բնորոշ հողի մշակման վաշխառուական սխտեմը, որը և հանգեցրեց աշխատավորության շարժումներին: Բարսեղ Կեսարացին հաղորդում է. «...որ սլայման կար՝ սլարտքի հատուցման դեպքում ներվում էր նրա վաշխը (տոկոսը)»³¹: Ուրեմն՝ IV դարի Հայաստանում արդեն մշակվել էին հողօգտագործման վաշխառուական նորմեր, որոնք և հանգեցրին եկեղեցու դեմ ուղղված ընդհանուր վրդովմունքի:

Պաշտոնական եկեղեցու դեմ ուղղված պայքարում Սեբաստիայի աշխատավորական խավի և եվստաթիոսականների շահերը համընկնում էին: Բարսեղ Կեսարացու ամբողջ մտահոգությունը այն էր, որ նշված կետում այդ երկու ուժերի միանալու դեպքում ընդհանուր եկեղեցին կտուժեր: Ահա թե ինչու նա ջանում է եվստաթիոսին ուղիղ հավատի բերել առանց վրդովված ամբոխի գիտության ու միջամտության:

Եվ որքան էլ Բարսեղ Կեսարացին ջանում է դանց առնել աշխատավորական հուզումների իրական փաստերը Փոքր Հայքում, այնուամենայնիվ, նրա ընդդեմ հերետիկոսների արտահայտած ցասումն ու վրդովմունքը լավագույն փաստարկն են աշխատավորական շարժումների թափի և ընդլայնվածության: Այս առթիվ նրա արտահայտած բաղձաթիվ մտքերը ժամանակակցի հավաստի հաղորդումներ են Հայաստանի և հայերի մասին:

Բ. Կեսարացին 376 թվականին Սամոսատի եվսեբիոս եպիսկոպոսին գրած մի թղթում արդեն խոսում է «անընդմեջ իրադարձությունների» և Սեբաստիայի հայոց երկու խմբի բաժանվելու մասին³²: Ինչպես հուշում է նույն թղթում արած Բարսեղի մի արտահայտությունը³³, Սեբաստիայի հայոց վրա մեծ ազդեցություն է ունեցել այլ առիթով հիշված հայազգի Թեոդոտ եպիսկոպոսը, որի մահից հետո զավառի ներքին հակասությունները պաշտոնական եկեղեցու դեմ ուղղված բացահայտ պայքարի բնույթ են կրել:

Ընդհանուր եկեղեցու դեմ պայքարի սկզբնավորման ու ընդգրկումի մասին է վկայում Բ. Կեսարացու մի այլ թուղթը՝ գրված դարձյալ 376 թվականին, ուր ասված է. «Արդեն տասներեքերորդ տարին է, ինչ անհավատները (հերետիկոսները) մեր դեմ հալածանք են սկսել, որի ընթացքում եկեղեցիներին ավելի շատ վիշտ է պատճառվել, քան այն ժամանակվանից ի վեր, ինչ բարձրացվում է Քրիստոսի Լվետարանը»³⁴:

Արդ՝ Բարսեղ Կեսարացու՝ այդ շարժումների ժամանակակցի ու ականատեսի վկայությամբ, 363 թվականից սկսած, սոցիալ-տնտեսական հողի վրա առաջացած և կրոնական երանդավորում ունեցող շարժումները արդեն զգացնել էին տալիս իրենց գոյությունը:

IV դարի 70-ական թվականներին, հակառակ եկեղեցու պաշտոնական անձանց սպասումներին, ընդհանուր եկեղեցու դեմ գոյություն ունեցող բոլոր դժգոհությունները գումարվում են «անհավատների շարժում» անվանման տակ, և սկսվում է եկեղեցիների անկման մի աննախադեպ ժամանակաշրջան: Ահա թե ինչպես է բնութագրվում այն Բ. Կեսարացու կողմից. «Հափշտակված են

31 Անդ, էջ 228:

32 Տե՛ս В. Великий, հատ. 7, էջ 165:

33 Խոսելով Սեբաստիայի որոշ մասի բացահայտ հակաբարսեղյան դիրքորոշման մասին՝ ավելացնում է. «որովհետև երանելի Թեոդոտը այլևս չկա...» (տե՛ս В. Великий, հատ. 7, էջ 166):

34 Անդ, էջ 176:

ուրախությունն և հոգևոր խնդությունը, ողբի են վերածվել մեր տոները, փակված են աղոթատները, եկեղեցու բեմում չի կատարվում հոգևոր ծառայությունը, վերացան քրիստոնեական ժողովները, ուսուցիչները չեն տնօրինում, չկան փրկարար խրատներ, ոչ հանդեսներ, ոչ երեկոյան ժամասացություն, ոչ այն երանելի ուրախությունը, որին եկեղեցական հավաքույթներում հանձնվում են աստծուն հավատացող հոգիները...»³⁵:

Թղթում ամենայն մանրամասնությամբ խոսվում է «Արևելքի խեղճության», «հովիվներին քշելու», «հոտը ցրելու» և այլնի մասին³⁶։ Այս ամենով հանդերձ, ինչպես հուշում է Է. Կեսարացու՝ Սեբաստիայի հայոց երկու մասի բաժանվելու և պաշտոնական եկեղեցու դեմ պայքարի ելնելու թուղթը, վկայակոչված հատվածում և ամբողջ թղթում հիմնականում խոսվում է Սեբաստիայում ծավալված շարժումների պատճառած ավերածությունների և շարժման մասնակիցների նոր սպառնալիքների մասին։ Դրա ծանրությունը ամենից հստակ պատկերացնում է Բարսեղ Կեսարացին, ուստի և ինքն էլ օգնություն է խնդրում իտալական և գաղղիական եպիսկոպոսներից³⁷։

Բարսեղ Կեսարացին այլոց օգնությանը գիմելով հանդերձ՝ Սեբաստիայի շարժումների դեմ առաջինը ինքը պայքարի ելավ։ Նա Փոքր Հայքի այլ գավառների եկեղեցիներին, նշանավոր երեցներին հղած թղթերով ջանում է մեկնաբանել կործանարար շարժման հետևանքները, պաշտոնական եկեղեցու դեմ կատարած նրա հանցանքը, դրանով իսկ աշխատելով խոչընդոտել շարժումների շարունակվող վտանգավոր ընդարձակումները³⁸։

Սեբաստիայում բռնկած շարժումն ինքնին Փոքր Հայքի անջատումից բացի կարող էր լուրջ վտանգ ներկայացնել Կեսարիայի թեմի մեծ հեղինակությանն ու ընդհուպ գոյությանը։ Դրա երաշխիքը կարճ ժամանակում շարժման մասնակիցների ձեռք բերած բացառիկ հաջողություններն են։ «Անհավատների իշխանության տակ են գտնվում մկրտությունը, հանգուցյալների հուղարկավորումը, այցելությունը հիվանդներին, վշտացյալների հանգստացումը, օգնությունը կեղեքվածներին, բոլոր տեսակի նսլաստները, հորհուրդների հաղորդակցությունը»³⁹։ Փաստորեն եկեղեցու ժողովրդի հետ ունեցած ամենակարևոր դերն ու մշտական կապի միջոցները անցել էին շարժման մասնակիցների ձեռքը, որով նրանք արդեն հնարավորություն ունեին ազդելու և իրենց շահերին ծառայեցնելու աշխատավորական այն մասին, որը չէր հարել շարժմանը և մնում է եկեղեցու շահերի պաշտպան։

Բարսեղ Կեսարացու թղթերում հետաքրքիր մանրամասներ են պահպանվել Սեբաստիայի հայոց սոցիալական շարժումների, նրանց որոշակի հաջողության և ըստ այդմ էլ եկեղեցուն թելադրած իրենց գաղափարախոսության մասին⁴⁰։

Բարսեղ Կեսարացու որոշ թղթեր պատմական Հայաստանի սոցիալ-տնտեսական կյանքի, արտադրական հարաբերությունների ու քաղաքական իրա-

35 Անդ, էջ 179։ (Հմմտ. է. Խ ա շ ի կ յ ա ն, Փոքր Հայքի սոցիալական շարժումների պատմությունից, Երևան, 1951, էջ 36)։

36 Տե՛ս անդ, էջ 177—182։

37 Տե՛ս անդ, էջ 180։

38 Տե՛ս անդ, էջ 167—168, 171—174։

39 В. Веллкенн, հատ. 7, էջ 182։ (Հմմտ. է. Խ ա շ ի կ յ ա ն, նշվ. աշխ., էջ 37)։

40 Տե՛ս անդ, էջ 190, 198, 238 և այլն։

վիճակի ուսումնասիրման իմաստով ուսանելի շատ բան ունենւ Այսպես, օրինակ, Հայաստանում ավատատիրական հարաբերությունների սկզբնավորման ու վաղ շրջանի առանձնահատկությունների ուսումնասիրման տեսակետից շատ արժեքավոր են Բարսեղի այս կամ այն առիթով արած դիտողությունները Հայաստանում գոյություն ունեցող հողօգտագործման սիստեմին, վաշխառուական հարաբերությունների սկզբնավորմանն ու ընթացքին վերաբերող, որոնց մասին մեր դասական շրջանի մատենագրությունը գրեթե ոչինչ չի ասում:

Բարսեղ Կեսարացու՝ Փոքր Հայքի եպիսկոպոսներին հղած թղթերը կամ հայոց եկեղեցու ու կյանքին վերաբերող խնդիրներ պարունակող այլոց ուղղված թղթակցությունները շատ հաճախ կարևոր տեղեկություններ են ունենում ոչ միայն քննվող, այլև հարակից խնդիրների շուրջ: Այսպես, օրինակ, Բարսեղ Կեսարացու՝ հիշյալ Տերենտիոս կուսակալին 372 թվականին գրած թուղթը կարևոր է նաև այլ առումով: Նրանում ասված է. «Եվ հիմա, իրերի այսպիսի իրավիճակում հասնելով մինչև Սատաղ, աստծո բարեհաճությամբ, թվում է, կարգավորեցի ամբողջ մնացյալը, հաշտեցրի հայոց եպիսկոպոսներին և զրուցեցի նրանց հետ... իսկ ինչ վերաբերում է այն բանին, որ Հայաստանում այսպիսի անփութությամբ խախտվում են օրենքները, ապա ես նրանց տվեցի կանոններ՝ նրանցով ինչպես հարկն է գործի դնելու իրենց հոգացողությունը»⁴¹:

Նախ՝ ի՞նչ հողի վրա կարող էր այնպիսի լուրջ բնույթ ստանալ հայ եպիսկոպոսների վեճը, որ Բարսեղ Կեսարացին ստիպված է եղել անձամբ միջամտել գործին: Այս իմաստով IV դարի Հայաստանում և ընդհանրապես Արևելքում պարարտ հող կար. աղանդավորական բազմաթիվ շարժումները, քրիստոնեության հաղթական տարածման շուրջ ծավալվող թեր և դեմ կողմերը, նորաստեղծ եկեղեցու համակիր և ընդդիմակալ խմբերը անսպառ աղբյուր էին հարատև վեճերի:

Երկրի ինքնությունը խաթարող նման պայմաններում ինքնին հասկանալի է Բարսեղ Կեսարացու «հայոց եպիսկոպոսներին հաշտեցնելու» կարևորությունը

Հետաքրքիր է նրա 375 թվականին հայ եպիսկոպոսին գրած մի թուղթը, ուր կարդում ենք. «Սպասեցեք ինձ, եթե աստված բարեհաճի, կգամ ձեզ մոտ, խորհուրդ կտամ այն ամենի շուրջ, ինչի մասին Ձերդ մեծությանը հնարավոր չէր գրել թղթում և, բոլոր դեպքերում, կաշխատեմ ձեզ պարգևել անհրաժեշտ խաղաղություն»⁴²: Կամ՝ Անտիոքի Սելիտոս եպիսկոպոսին ուղղված մի թղթում, որին կանդրադառնանք այլ առիթով, հիշեցնում է, որ ոմն Փավստոսի ձեռնադրության հետ կապված անախորժության համար իրեն չշարախոսեն, որ դրանում ինքը հանցանք չունի⁴³: Այս և նախորդ փաստարկներն ինքնին վկայություն են ժամանակին նրա դեմ խմորված հայ (և ոչ միայն հայ) վանական մտքի որոշ խավր ըմբոստացման: Երա առավելապես պետք է վերագրել հայ վանականության որոշ խմբի ասորական թեքմանն ու հակումներին:

Փոքր Հայքը հոգևոր խոշոր կենտրոններից հեռու և կտրված լինելու պատճառով փաստորեն անհաղորդ էր արտաքին աղանդավորական շատ խմորումների: Բայց հայոց հետ կապված յուրաքանչյուր խնդիր, նրանց հավատի միասնությունը դիմակայող ամեն մի միջադեպ հասու էր հայերին՝ շնորհիվ Բար-

41 В. Великий, *Հատ.* 6, էջ 216.

42 В. Великий, *Հատ.* 7, էջ 139—140.

43 В. Великий, *Հատ.* 6, էջ 214.

սեղի հայոց եպիսկոպոսների հետ ունեցած թղթակցության: Ինչպես երևում է նրա թղթերից, Բ. Կեսարացու մտահոգությունը առավել ընդգծված ու բացահայտ է, երբ խոսքը եկեղեցական անախորժ վեճերի, ընդհանուր թշնամուն դիմակայելու մասին է: Այսպես, օրինակ, նրա 375 թվականին հայերին գրած թղթերից մեկում ասված է. «Դուք, ապրելով Հայքի ծայրամասում, բնականաբար անհաղորդ եք բաղում շարժումների: Իսկ մենք, որ մասնակիցն ենք գործի բուն իսկ ընթացքին, բաղում տեղերից ամեն օր լուրեր ենք ստանում կործանվող եկեղեցիների մասին ու մեծ անհանգստություն ենք ապրում՝ չլինի թե ընդհանուր թշնամին, նախանձելով հարատև խաղաղությանը, ձեր կողմերում էլ իր որոմի հունդերը ցանի, և Հայաստանի մի մասը անցնի թշնամիների ձեռքը»⁴⁴:

Բարսեղ Կեսարացու որոշ թղթեր արտաքուստ որքան էլ անմեղ տեսք ու կրոնական բովանդակություն ունենան, այդուամենայնիվ, նրանցում առկա են ժամանակի քաղաքական իրավիճակը, մասնավորապես Փոքր Հայքի սոցիալ-տնտեսական, քաղաքական հարաբերություններին առնչվող դանապան կողմեր: Այս իմաստով կարևոր է նրա 373 թվականին Փոքր Հայքի գավառներից մեկի՝ Նիկոպոլսի, Թեոդոտ եպիսկոպոսին գրած մի թղթի հետևյալ հաղորդումը. «Ի դեպ, Փավստոսը եկավ ինձ մոտ՝ Պապի թղթով և կամենում էր եպիսկոպոս ձեռնադրվել: Բայց երբ ես քո և մյուս եպիսկոպոսների բարեպաշտության հավաստիք պահանջեցի՝ արհամարհեց ինձ, գնաց Անթիմոսի մոտ և, առանց ինձ տեղյակ պահելու, ձեռնադրվեց նրանից»⁴⁵:

Ա. Սուրբյանը մի առիթով նկատել է. «Իսկ այն անձն ուսկից թուղթ ունէր Փաւստոս, Սուրբ Բարսղի թուղթն կը կոչէ գնա պապա (—α—α), որ նոյնանիշ է մեր Հայր բառին...»⁴⁶: Ի հաստատումն ասվածի՝ ուսումնասիրողը վկայակոչում է Փ. Բուզանդի հաղորդումը հայոց մեջ հնում հայր-մարդապետների գոյության մասին⁴⁷:

Հայ արքունիքում, հարկավ, մարդապետ-ներքինապետների երբեմնի գոյությունը անժխտելի է, որոնց անվանը հարակից էր «Հայր» տիտղոսը: Ա. Սուրբյանը այս տիտղոսը առանց երկմտելու նույնացնում է Բարսեղ Կեսարացու ընկնող թղթում հիշված «Պապա» (παππ) անձնանվան հետ, որը, ինչպես կտեսնենք, համոզիչ չէ:

Խնդրին առնչվում է բանասեր Հ. Թորոսյանի այն դիտողությունը, թե «Ոմանք այդ Παππ բառը յատուկ անուն առնելով՝ կը հասկնան Պապ իշխան մը, և ո՞վ կրնար ըլլալ այդ անձը՝ եթե ոչ մեր Արշակ Բ-ի որդին և զահաժառանգը...»⁴⁸:

Որ Բարսեղ Կեսարացու թղթում հիշատակված «Պապը» նույն հայոց Պապ թագավորն է, հստակ երևում է նրա իր զահակալության տարիներին Հայաստանում ծավալած գործունեությունից և որոշակի նպատակով հայոց եկեղեցու գործերին միջամտելու փաստից:

⁴⁴ В. Великий, հատ. 7, էջ 141:

⁴⁵ В. Великий, հատ. 6, էջ 245:

⁴⁶ Ա. Սուրբյան, Մեծն Ներսէս Պարթև (տե՛ս «Բազմավէպ», 1877, հատոր 10, էջ 331):

⁴⁷ Տե՛ս անդ:

⁴⁸ Զ. Թորոսյան, Հ. Սրսէն Սուրբի (տե՛ս «Բազմավէպ», 1932, N 8—9, էջ 353):

Արդ, այդպես ընդունելու դեպքում, հայոց Պապ թագավորը եպիսկոպոսության իր նախընտրած թեկնածուն է առաջադրում, որը և Բ. Կեսարացու կողմից մերժվում է:

Խնդրին առնչվում է Բարսեղի 373 թվականին գրած վերոհիշյալ թուղթը՝ ուղղված Անտիոքի Մելիտոս եպիսկոպոսին, ուր ասված է. «Կամենում եմ ձերդ բարեպաշտությանը հաղորդել, որ Պապի կողմից ուղարկված Փավստոսը Անթիմոս եղբոր կողմից ձեռնադրվել է եպիսկոպոս, պատվական Կյուրեղ եղբոր փոխարեն, առանց իմ համաձայնության, որից և Հայաստանը լցվեց խռովություն»⁴⁹:

Հայտնի է, որ Պապը սկզբունքորեն դեմ էր հայոց Հայրապետի՝ Ներսեսի, վարած հոգևոր գործունեությանը: Բայց վերջինիս վայելած մեծ ժողովրդայնությունը թագավորին թույլ չէր տալիս բացահայտ պայքարելու նրա դեմ: Ուստի և Պապը որոշեց առաջինը վերջ տալ Ներսեսի կյանքին⁵⁰:

Որ Ներսեսի կենդանության օրոք Պապը իրոք չէր կարող հասնել իր որոշակի ծրագրին, դա երևում է նրա այն ավերածություններից, որ կատարեց Ներսեսի մահվանից հետո. «...սկսավ հրաման տալ յայտնապէս յաշխարհին աւերել զայրենոցսն և զորբանոցսն՝ զոր շինեալ էր Ներսէս ի պաւոս զաւառս, և աւերել զկուսաստանսն...»⁵¹:

Ներսեսի հաջորդը՝ Հուսիկը, այսպես ասած, աննկատ անձնավորություն էր. «Եւ սա քրիստոնեայ, բայց համարձակութեամբ յանդիմանութեամբ ինչ ընդ ումեք շիշխէր բարբառել՝ կամ զի երկնչոտ էր և հաւան, և ըստ կամայ թագաւորին միայն ունէր զպատիւն...»⁵²: Պապ թագավորը իր նպատակին հասնելու և անարգել գործելու համար հոգևոր դասի պատասխանատու անձանց փոխարինում է յուրայիններով: Հենց դա էլ վրդովմունք է առաջացնում Հայաստանում: Այս անգամանքը հայ սկզբնաղբյուրներից բացի հաստատվում է նաև Բարսեղ Կեսարացու վերոհիշյալ թղթով: Վկայակոչված հատվածի՝ «որից և Հայաստանը լցվեց խռովություն» միտքը վերաբերում է Պապի կամակատար եպիսկոպոսների իմաստաբեկ գործունեությանը, որոնք թագավորի խորհրդով պայքարում էին Ներսեսի ձեռնարկումների և Բ. Կեսարացու թեմի դեմ: Իրականում խուլ պայքար է եղել հայոց Պապ թագավորի և Կապադովկյան Կեսարիայի հոգևոր թեմի առաջնորդ Բարսեղ Կեսարացու միջև՝ հայկական հողի վրա, հայոց եկեղեցուն և պետականությանը առնչող խնդիրների շուրջ:

Բարսեղի հայոց եպիսկոպոսներին ուղղված թղթերում պարզորոշ երևում է հեղինակի հայոց հետ ունեցած ջանադիր աշխատանքը, նրա արդասավոր ու վճռական նշանակություն ունեցող կողմերը:

Երբեմն, այս կամ այն խճճված խնդրի առիթով, Բարսեղ Կեսարացին դժվարացել է գտնել վերջնական ու ճիշտ լուծում, տալ, այսպես ասած, անշահախնդիր ու անկողմնակալ խորհուրդ: Այս կարգի խնդիրներում առավել մեծ է Բարսեղի մտահոգությունը, Փոքր Հայքի եպիսկոպոսների հետ խորհրդակ-

⁴⁹ В. Великий, հատ. 6, էջ 244: Ի դեպ, Մ. Զամչյանը ենթադրում է, որ այս Փավստոսը նույն մեր մատենագիր Փավստոս Բուզանդն է: Այս ենթադրությունը անհավանական է թվում, որովհետև Բուզանդի «Պատմության» մեջ Բ. Կեսարացին բացառիկ հարգված ու իմաստուն եկեղ. գործիչ է ներկայացված (տե՛ս Փ. Բուզանդ, նշվ. աշխ., էջ 82, 103—109), Մ. Զամչյան, Պատմություն հայոց, Ա հատ., Վենետիկ, 1784, էջ 447—448:

⁵⁰ Տե՛ս Փ. Բուզանդ, նշվ. աշխ., էջ 221:

⁵¹ Անդ, էջ 232:

⁵² Անդ, էջ 231:

ցելու անհրաժեշտությունը: Եվ երբեմն, ինչպես պետք է եզրակացնել առանձին թղթերից, նա խորհրդակցել է նույնիսկ հայոց կյանքի ու մշակույթի հետ շառընչ-վող անձանց հետ՝ հարցի ճիշտ լուծումը գտնելու ազնիվ նպատակադրումով:

Ահա թե ինչու Բարսեղը, իրեն նմանեցնելով ալեկոծ ծովում խարխափող նավորդի՝ հեռու ավերում ցուցող ջահի հետ է համեմատում Սամոսատի Եվ-ւեբիոս եպիսկոպոսից ստացած թուղթը⁵³:

Այսպիսով, Բարսեղ Կեսարացու հոգևոր իրավասության տակ էին գտնվում Փոքր Հայքի Սերաստիա, Նիկուպոլիս, Սատաղ և «Գաղութք հայոց» հայաբնակ կենտրոնները, որոնց հետ առնչվող յուրաքանչյուր խնդիր IV դարի 70—80-ական թվականներին անկարող էր վճռվել առանց Բարսեղ Կեսարացու անմիջական միջամտության:

Բարսեղ Կեսարացու այդ տասնամյա գործունեության ժամանակաշրջանում վերջնականապես ձևավորվեցին ու ամրապնդվեցին հայ-հունական եկեղեցական, ինչպես նաև մատենագրական փոխառնչությունները, որոնք հոգևոր խնդիրների բնագավառում գոյատևեցին Բարսեղի մահվանից հետո էլ մոտ ութ տասնամյակ ևս, իսկ մշակութային փոխազդեցություններն ու ընդհանրությունները՝ մինչև միջնադար:

Բ. Կեսարացու Փոքր Հայքի հայերին, եկեղեցական նշանավոր անձանց դրած թղթերում, հայազգի եպիսկոպոսների զանազան հարցումներին տված պատասխան-լուծումներում պարզորոշ երևում են ժամանակի հայոց եկեղեցու սկզբնավորման հետ կապված առանձնահատկությունները, ներքին հակասություններն ու դրա հետ կապված բարդությունները:

Եկեղեցական պատմության շատ նշանավոր ուսումնասիրողներ զանազան իրարամերժ կարծիքներ են հայտնել հայ վանականության ծագման ու վերջնական ձևավորման մասին⁵⁴: Բարսեղ Կեսարացու Փոքր Հայքին վերաբերող թղթերն իրենց հավաստի մանրամասներով ինքնին լրացնում են այդ իմաստով հայ դասական շրջանի մատենագրության թերին և հնարավորություն ընձեռում ասելու, որ. «Աւելորդ է ոմանց պնդելն թէ Հայք ոչ ընդունէին զձեռնադրութիւն ի Կեսարիոյ, այսինքն Հայ կաթողիկոսունք. այլ յայտնի նոյն իսկ մերքս կ'ըսեն թէ «ի Լուսաւորչէն մինչև ՚ի Սահակ հայրապետն» ՚ի Կեսարիայ ձեռնադրէին Կաթողիկոսունք. յորժամ եղև ժողով Քաղկեդոնի՝ բաժանեցան Հայք ՚ի Յունաց»⁵⁵:

⁵³ Տե՛ս В. Веллхейм, հատ. 6, էջ 217:

⁵⁴ Տե՛ս Յ. Թօփճեան, Ծագումն հայ վանականութեան (սույս, 1905, № 15, էջ 360—361):

⁵⁵ Ա. Սուրբեան, Մեծն Ներսէս Պարթև (տե՛ս «Բազմավէպ», հատոր 16, Վենետիկ, 1677, էջ 322):